

Savjetovanje bibliotekara BiH u Bihaću

JUNI NA UNI – S KNJIGOM

Obnovljeno Društvo bibliotekara

Peto po redu, već pomalo jubilarno, rekao bi mr. Alija Mesić, direktor Kantonalne i univerzitetske biblioteke u Bihaću, savjetovanje bibliotekara Bosne i Hercegovine traje već drugi dan u Bihaću. Pedesetak učesnika iz Sarajeva, Gradačca, Zenice, Goražda, Mostara, Maglaja, bibliotekara, stručnjaka, profesora, pisaca i izdavača govorilo je o ulozi i značaju biblioteka u nas, komuniciranju u informacijskom dobu, protoku informacija, knjižnoj građi i međunarodnim standardima, internacionalnoj kulturnoj suradnji, kreativnim školskim bibliotekama, multimedijalnim projektima, te uopće o stanju kulturne svijesti u našoj zemlji.

Među ostalima, zapažen je bio nastup prof. dr. Enesa Kujundžića, koji je govorio o digitalizaciji knjižne građe i međunarodnim standardima, te o kreativnim školskim bibliotekama, dok je Amra Rešidbegović, pomoćnik direktora Nacionalne i univerzitetske biblioteke BiH, predstavila publikacije ove ustanove. Narcis Saračević je govorio o multimedijalnim projektima Biblioteke grada Sarajeva, a gost manifestacije ugledni publicista iz Zagreba dr. Danko Plevnik je podnio kraće izlaganje o veoma atraktivnoj temi „Brzina i istodobnost – temeljne pretpostavke komuniciranja u informacijskom dobu“.

Domaćin ovog vrlo uspješnog skupa mr. Alija Mesić je kazao za Oslobođenje da je veoma zadovoljan da susretanja bibliotekara BiH, a pod nazivom „Jun na Uni“, traju i to baš u Bihaću, zadovoljan je odzivom i količinom i kvalitetom razmijenjenih informacija i saznanja, a ne propušta kazati kako ima i stanovito razumijevanje kantonalnih i općinskih struktura vlasti, iako bi za jači utisak i veći doseg biblioteke i knjige uopće u nas, potrebna bila i federalna pa i državna podrška.

U okviru Savjetovanja održana je i sjednica Predsjedništva Društva bibliotekara BiH, koje je nedavno, nakon duže stagnacije, obnovilo svoj rad. Novi predsjednik Društva Mesud Smajić, inače direktor Biblioteke grada Sarajeva, vrlo učinkovito planira afirmirati rad Društva u cijeloj državi.

U okviru Savjetovanja predstavljena su i dva izdavača, „Dobra knjiga“ i „Zalihica“ iz Sarajeva. U popodnevnim satima učesnici Savjetovanja su imali na programu „specijalitet“ Bihaća i Krajine, rafting na Uni, kao još jednu promociju novog Nacionalnog parka Una.

Ramo Kolar

Oslobođenje, 14. jun 2008. godina

Završeno Savjetovanje bibliotekara BiH u Bihaću

PITAJ SVOG KNJIŽNIČARA

Više od pedeset predstavnika javnih i univerzitetskih biblioteka iz mnogih gradova BiH završilo je u subotu trodnevno Savjetovanje u Bihaću pod nazivom „Jun na Uni“. Ovi, peti po redu Susreti, poslužili su razmjenu informacija, iskustava i dostignuća u suvremenom bibliotekarstvu u nas. Na kraju su doneseni zaključci koji će se realizirati do narednog susreta također u Bihaću i kod domaćina Kantonalne i univerzitetske biblioteke kojom rukovodi mr. Alija Mesić.

Tako je rečeno da će Društvo bibliotekara / knjižničara u BiH intenzivirati aktivnosti u matičnim službama općih biblioteka na revitalizaciji i unošenju inovacija u školske biblioteke, a u skladu sa smjericama IFLA i UNESCO. Zaduženi su učesnici savjetovanja Frida Biščan i Alija Mesić da u okviru međunarodne kulturne suradnje pokrenu realizaciju prijedloga da se u jednoj od narodnih knjižnica Hrvatske ustanovi biblioteka za bošnjačku nacionalnu manjinu. Također je zaključeno da se još više propagira knjiga i biblioteke, a podržali su i inicijativu da se što prije u bibliotekama u BiH uvede u svijetu poznati sistem „*Pitaj bibliotekara / knjižničara*“, kao i da se više radi na podsticanju volonterskog rada u bibliotekama. Podržano je i održavanje druge konferencije bibliotekara / knjižničara F BiH, koja je planirana za oktobar ove godine u Tešnju.

Ramo Kolar

Oslobođenje, 15. jun 2008. godina